



**Komunikadu Imprensa**  
**Tribunál Distritál Dili**  
**21 Marsu 2016**

**Tribunál Distritál Dili kontinua kondena pena prizaun no indemnizasaun sivil  
ba krime violasaun seksuál ho agravasaun**

Iha 14 Marsu 2016, Tribunál Distritál Dili prezide leitura akordaun no kondena arguidu JFAS ho pena prizaun efetiva tinan 12 no selu mós indemnizasaun US\$700.00 ba lezada, tanba provadu komete krime violasaun seksuál hasoru lezada ON, iha Distritu Dili.

Ministériu Públiku akuza arguidu kontra artigu 172 Kódigu Penál kona-ba krime violásaun seksuál konjuga ho artigu 173 alinea 1 (d) kona-ba agravasaun.

“JSMP kongratula desizaun ne’e tanba kondena arguidu ho pena adekuaudu no aplika indemnizasaun ba lezada atu halo prevensaun nomós rekupera lezada nia sofrimentu. JSMP hanoin sentensa ne’e, nu’udar meius atu eduka comunidade hadok-aan hosi violénsia,” dehan Diretór Ezekutivu JSMP, Luis de Oliveira Sampaio,.

Tribunál prova katak iha 24 Juñu 2015 iha tuku 01:00 madrugada, arguidu tama ba lezada nia kuartu, sae ba lezada nia leten, buti lezada nia ibun no mesmu lezada hakilar, arguidu lori tudik ameasa lezada atu sona kuandu lezada kontinua hakilar. Depoisde ida-ne’e, arguidu komete violasaun seksuál hasoru lezada.

Iha akontesementu ne’e, lezada hakilar, maibé arguidu tuku dala 1 iha lezada nia ibun, kakorok no ain halo lezada tauk. Tribunál mós prova katak problema ne’e akontese lezada foin halo tinan 16. Faktus sira ne’e prova bazeia ba konfisaun partiál hosi arguidu, deklarasaun lezada no testamuña sira.

Kazu ne’e rejista iha tribunál ho Nú. Prosesu: 0089/2014.DIBCR. Julgamentu ne’e prezide husi juis koletivu ne’ebé representa hosi Dra. Jacinta Correia da Costa. Enkuantu ministériu públiku representa hosi Dr. Reinato Bere Nahak no arguidu hetan defeza hosi Dr. Sergio Dias Quintas hosi eskritóriu defensória públiku.

Rua setubal, Colmera, Dili Timor Leste  
PoBox: 275  
Telefone: 3323883

[info@jsmp.minihub.org](mailto:info@jsmp.minihub.org)

[www.jsmp.tl](http://www.jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl

Atu hetan informasaun liutan bele kontaktu:

Luis de Oliveira Sampaio  
Diretór Ezekutivu JSMP  
E-mail: [luis@jsmp.minihub.org](mailto:luis@jsmp.minihub.org)